

Saktiandi dekati pelajar SIT dalam dialog

Sesi anjuran Reach bertujuan bincang prospek pekerjaan, peluang bagi anak muda

HAMPIR 40 pelajar Institut Teknologi Singapura (SIT) menghadiri dialog bersama Anggota Parlimen (AP) GRC Bishan-Toa Payoh, Encik Saktiandi Supaat, semalam.

Acara itu dianjurkan unit maklum balas pemerintah Reach dengan kerjasama SIT untuk mendampingi pelajar di institut itu.

Bertemakan *Aspirasi Untuk Masa Depan – Menangani Peluang dan Cabaran*, dialog itu bertujuan membincangkan prospek pekerjaan dan peluang bagi anak muda di Singapura.

Dalam sesi sejam lebih itu, peserta berpeluang mengemukakan soalan dan pandangan kepada Encik Saktiandi, yang juga anggota panel penyelia Reach.

Encik Saktiandi menyifatkan perbincangan itu sebagai berguna untuk memahami keprihatinan pelajar, terutama sekali yang akan lulus dan keluar mencari pekerjaan tidak lama lagi.

“Peserta sesi itu prihatin tentang landskap pekerjaan masa depan dan apa kemahiran yang mereka perlukan untuk berjaya dalam alam pekerjaan yang kompetitif,” ujar Encik Saktiandi.

Beliau juga merupakan anggota Jawatankuasa Parlimen Pemerintah (GPC) bagi Perhubungan dan Penerangan, Pembangunan Negara serta Kewangan dan Perdagangan dan Pe-



PELAJAR PRIHATIN: Antara keprihatinan yang diluahkan pelajar SIT dalam satu dialog bersama Encik Saktiandi (*kiri*) di kampus SIT di Dover Drive semalam ialah landskap pekerjaan masa depan dan kemahiran yang diperlukan untuk berjaya dalam sekitaran berdaya saing. – Foto M.O. SALLEH

rusahaan.

Selain itu, perbincangan itu turut menyentuh tentang SkillsFuture dan cara meraih manfaat daripada inisiatif di bawah gerakan itu.

Seorang peserta sesi itu, Cik Haziqah Haron, mendapati beberapa panduan yang dikongsi Encik Saktiandi dalam sesi itu amat berguna.

“Beliau menekankan pentingnya program bekerja sambil belajar dan pekerjaan sambilan, serta mula membina portfolio awal semasa di universiti lagi dan tidak tunggu apabila sudah tamat pengajian,” ujar Cik Haziqah, daripada jurusan Makanan dan Pemanakan Manusia.

Seorang lagi peserta, Encik Danial

Azri Ismail, pula meraih inspirasi daripada sesi itu untuk melanjutkan pengajian atau mencari pekerjaan dalam bidang yang dipelajari.

Satu lagi dialog bersama pelajar SIT dijadualkan minggu depan.

Dua dialog itu merupakan sebahagian daripada usaha Reach mendampingi pelbagai kumpulan tukikan.